


Aruba Dushi Tera

E leyenda di Rooi Taki



E rooi di Rooi Taki di awendia.

Rooi Taki ta un cunucu masha bieco cu ta pertenecé na Shon Eloi. Su mayordomo ta Don Pedro, kende a bin fey Venezuela cu su famia pa traha aki. Ta Don Pe ta manda na Rooi Taki. E ta planta e parti mas grandi di e cunucu cu pinda, boonchi bonovis, boonchi duro, pa Shon Eloi. E resto di cunucu ta p'e planta pa su mes. Asina e por mantené su famia. Don Pe ta planta su pida tereno cu maishi grandi, pampuna y boonchi. E ta cría galiña, cabrito y carné tambe. Pedro ta feliz na Rooi Taki, pero a jega un momento cu floheza a drenta curpa y el a negligisha su pida cunucu. E nó a planté!

Pronto bashí di cuminda a drenta su cas. Galiña y otro bestianan a bira poco pa falta di cuminda. Su jiunan ta jora di hamber. Don Pe no kier drenta cas mes pa mira e muchanan y tur ta su falta!

Pero el a haya un idea con pa haya cuminda. Mardugá el a lanta, siya su burico "Echa p'alante" p'e baha Playa bai busca cuminda pa plantador cerca Shon Eloi. El a bisa Nana, su casá, pa sinta wak caminda. Ora Nana miré ta bin di leo, e por wel di cuminza pone aw'i funchi y aw'i koffie na candela.

Tempran el a coi caminda pa Playa, pero promé el a pasa den e lodo di Balashi pa "Echa p'alante" por susha su patanan cu lodo. Asina e por muestra of gaña Compa Eloi, cu ta masha awa a cai na Rooi Taki.

Ora cu Don Pe a jega, Compa Eloi a spanta di miré na Playa. "Ta kik'a pasa, Pe?" El a puntra.

"Compèr, ta un nubia masha grandi a kibra riba Rooi Taki ayera nochi. E trankera dje rooi pariba a lastra saka esun band'i pabao, bai benté te den Balashi ayá! Mi ta kere cu nos por planta Rooi Taki trobe. Pesey m'a bin busca cuminda pa plantador!"

Compa Eloi a guli e storia y a lga Don Pe drenta y saca tur loke e mester di come: saconan di maishi, hariña geel y boonchi, tres pisca salo, 30 liber di koffie, poco sucu klink, un flasco di jenever y un saco di pinda seco. Shon Eloi mes a yuda Don Pe hisa tur e carga riba burico.

Na cas Nana a prepará tur cos y ta sintá cara pa caminda, manera Pe a bisé. Leo aya e ta mira un bulto grandi. "Esey ta Pe sigur", e ta pensa y el a bai sende candela bao di e dos weanan. Un pa funchi y e otro pa hasa koffie.

Un rato despues Pe a jega y hunto nan a baha tur e carga hiba den cushina. Ya e holor di koffie a plama den cas. Pisca tambe ta tota riba carbon y e salo dje pisca ta tas-tas riba e candela. Mesora e muchanan a lanta di e holornan di cuminda.

Nana ta parti cuminda pa e muchanan prome. Don Pe a sinta y a haci señal di cruz p'e gradici Señor y pidi salú pa Compa



E cunucu y e caminda di Rooi Taki

E leyenda di Rooi Taki

Eloi. El a reza y primintí cu nunca mas elo gaña.

Mas laat tur a bai cama barica jen. Nana a drumi mei-mei di su jiunan. Don Pe so ta lantá, su consenshi ta molestié. Mañan Compa Eloi ta bin mira. Ta con ta haci? El

a gaña! Ta cos cu nunca e sa haci, el a peca!

Porfin el a pega soño riba su banki den ramada. Pero un rato despues un lamper skerpi, sigui pa boroto di strena a spierté. E ta hole tambe un holo dushi di mondi muhá. Don Pe a bula lanta bai pafo y a spanta. Nunca el a jega di mira un tempo di awa dje magnitud ey na Rooi Taki, anto na luna di Augustus.

El a cai abao na rudía. Dios a scucha su suplica como señal cu Señor a pordoné.

Awa a basha te lastra e trankera dje cunucu bai pegé te den Balashi, manera cu el a conta Compa Eloi den su gañamento. Pero awor ta realidad!

Pa su mañan ata Compa Eloi a bin mira e awacero cu a cai na Rooi Taki. E cunucu ta tapá cu awa.

Compa Eloi a bisa: "Esaki si jama awa jobe ayera nochi!"

Don Pe ta contestá: "Edi ayera nochi tabata nada, esun di antayera nochi tabata pió!!..." Y atrobe el a gaña p'e scapa su cara.....



Otro bista bunita di Rooi Taki.

Cu gradicimento na Sr. Theodoor Dañe pa presta nos su manuscrito.


BO TABATA SA CU..... E promer joyita di Aruba Tivoli Club a wordo eligí na 1947 y tabata Griselda Arends, kende awor ta un Señora di mas cu 50 aña.....?



*No djies pidi
un refresco...
Pidi un...*



PEPSI



E refresco pa e generacion nobo!



CHABALITO

Number 6 - Año 2 - February, 2000 - Afl. 2,=

